

編號 1

姐公个紅棗細寶貝

劉純汝原作

記得係略略仔知人我以來，逐年在翕熱个避暑，阿姆總係會渡係轉姐公屋下，因為姐公戴在苗栗公館客家莊，種一大遍个紅棗樹，所以七、八月緊工時節，屋下大細會總動員轉來搵手。

在收成趕事个朝晨，天甫甫仔光，姐公、姐婆、阿舅摺姑婆，總係戴帽仔摺手袖仔；著長褲過水靴……全身包好勢，摺等大大細細个塑膠桶摺布袋這兜，出發去園肚摘紅棗咧！見擺，係總係睡過边¹跔毋著，斯單淨在屋下搵手擇紅棗个份。十歲該年，分係印象當深，打早還言五點就輕輕仔跋跣床，恬恬仔著好衫褲，在廳下等姐公佢兜。

姐婆看著係，著下驚講：「唉哦！你這隻細孬仔，日頭都還在該睡目，坐在這位做麼个呢？」

係煞煞講：「分係跔好無？」

姐婆續等講：「徑手徑腳就有，棗仔樹笏了了²，係分佢劊著³，會喊阿姆哀唷！大人無閒直掣，斯無人會插你哦！」

顛倒最惜係个姐公，笑笑仔講：「毋怕，分阿瑄跔，佢乜盡久無去紅棗園咧，共下來看姐公个紅棗細寶貝哦！」

「新娘上轎——頭一擺」分係跔著咧！一落到園肚，係像飛出鳥籠个鳥仔，暢到耐毋得，緊行緊摘、緊食緊行。哇！逐串啾紅大粒、精神飽滿；咦！係聽著樹頂絡食个細鳥仔啾啾滾，鬧熱煎煎叫無停，唱出一條條好聽个歌仔；噯！細樹極背仰會因等恁生趣个弄毛蟲呢？在該蠕蠕動像跳舞樣；還有當多毋識看過个細蟲仔，滿哪仔趁來趁去搞園人尋。「你兜愛細義兜，毋好分棗仔个笏劊著哦！」看到全無瞞目个係，好心摺佢兜提醒，噯毋記得係來搵手个唷！

識得過「紅棗王」个姐公，紅棗係佢个細寶貝，一溜里來，花盡多心思像照顧滿子樣照顧佢兜，姐公長透講：「人勤地獻寶，人懶地生草。用心照步來做，就會打出品質湛斗个紅棗咧！」兩年前，姐公身體無鬆爽，既經無法度去園肚做事，現下个紅棗乜較歉收咧，細寶貝可能係日思夜想姐公，噯毋記得愛好好成長咧！

係想摺姐公个紅棗細寶貝深深感謝，有你兜正有姐公个歡喜農場，你兜還連起歸屋个幸福味緒，分係有暢樂个童年回憶。這下僇俚共下來祈求姐公大寶貝，平平安安、康康健健哦。

¹ 睡過边：音 shoi⁺ go[~] fang[~]；睡過頭。

² 笏了了：音 ned liau^ˊ liau^ˊ；刺很多。

³ 劊著：音 cam do^ˊ；刺到。

編號 2

佢曉搵手咧

廖惠貞原作

佢在屋下座大，阿姆講：「最大个愛有好樣。」所以佢常常帶等老妹共下學習摺搵手。又聽阿婆講：「有緣正入共家門，一屋下人愛共心。」所以佢乜當聽話。

佢雖然生到像大人恁高，毋過佢今年正十空歲定定，還係細人仔。屋下个世大人有四儕，阿公、阿婆、阿爸摺阿姆。佢看世大人歸日愛上班賺錢，日日做到兩頭烏，實在辛苦！細人仔當然愛多學做兜事情較好哪！

從細佢就好在灶下看阿姆煮食，佢對一年生開始，就會搵手。阿姆煮菜、佢煮湯，兩儕歡喜煮食，七手八腳菜就上桌，阿爸講佢恁乖，老妹摺佢拍手，佢越學就越快樂！佢乜盡好跔阿婆去市場。市場係鬧熱又生趣个所在。做得認識當多東西，尤其係青菜，像苦瓜摺黃瓠愛掛皮煮，菜瓜摺瓠仔愛刨皮，芹菜愛食莖，番薯葉、芥藍菜葉仔摺莖斯做得食，細笏瓜¹洗淨就好食，蔥仔、蒜仔仰般分，這兜全係在買菜時節學著个。

逐日除忒微毛末節，像：搵手抹地泥、撿摯、收衫褲這兜，佢還會學煮飯。有一擺，阿姆出門，阿婆當愁慮，佢講：「阿婆！毋使愁，當晝佢來煮。」米洗好，放落電鑊煮，堵好有一鑊爌肉²，佢放到瓦斯爐用文火暖燒，續等煎卵包，炒一盤薤菜，還煮一鑊包粟湯，阿姆教過佢煮湯愛細義，毋好燒著！佢還放兜香菜仔敲香，兩下半就喊老妹排碗箸，喊阿公、阿婆食飯！阿公、阿婆阿腦佢：「佢个戇孫女大囉！恁慶！」佢試著當沙鼻！

佢去到學校乜會搵手，因為佢係「細先生」。看先生歸日無閒直掣，愛改一大堆个簿仔，所以佢會摺先生搵手，當晝頭就無歇睏。拿等紅色个筆，目珠擘金金檢查同學个簿仔，毋著个就用紅筆箍起來，再過請同學改正來，又順續教一下毋會个人，恁樣个工作佢毋會試著恅，感覺有摺同學搵手著。

有一句話講「多學多得」，正經哦！佢學著當多，感謝世大人分佢機會又信任佢，佢會繼續學習，佢會煮飯哩啲！

¹ 細笏瓜：音 seˋ ned guaˋ；小黃瓜。

² 爌肉：音 kongˋ ngiug；紅燒肉。